

SOLENIIDADE JEZÚS NIA FUTAR FUAN SANTU (SAGRADO CORAÇÃO DE JESUS)

Kultu ba Kristu nia futar Fuan santu, moris ho místiku miedevál sira nu'udar eskola ezijente santidade nian no sai populár depoizde revelasaun sira ba Santa Margarida Maria Alacoque (1673-1675). Sarani barak maka moris tuir espiritualidade ida-ne'e no, liuhusi nia, sira sai santa durante sékulu ikus sira-ne'e. Presiza filafali ba espiritualidade ne'e nia fonte bíblika no patrística sira atu deskobre filafali ninia rikusoin no atualidade. Hodi lori ita atu hatán ba Kristu nia domin, hadomi nia no ho nia hadomi Aman, kultu ba Kristu nia futar Fuan santu lori mós ita atu hadomi maun-alin sira, liuliu sira ne'ebé kí'ik no kiak, hodi loke an ba solidariedade fraterna.

Lectio: Evanjellu: Mateus 11, 25-30

«Iha oras ne'ebá Jezús harohan, dehan: “Aman, lalehan no rai nia Na'i, Ha'u hahi Ita tan Ita subar tiha buat hirak ne'e ba matenek no neon na'in sira hodi hatudu ba kiik oan sira. Loos duni, Aman, tan ida ne'e duni mak Ita hakarak. Ha'u Aman tau tiha buat hothotu iha ha'u liman; ema ida la hatene Oan, Aman de'it mak hatene; nune'e mos ema ida la hatene Aman, Oan mak hatene, no mós ema ne'ebé Oan hakarak hatudu ba nia.” “Mai besik Ha'u, imi hotu ne'ebé kole no terus; Ha'u sei fó kmaan ba imi . Imi simu ha'u-nia ukun ba hodi banati tuir Ha'u, tan Ha'u laran kmaus no haraik an; no imi sei hetan kmaan ba imi nia klamar. Basá ha'u-nia ukun mamar, ha'u-nia naha kmaan”».

Hanesan mestre sira nia tempu nian, eskolante barak maka hale'u Jezús no ba sira nia hatudu Maromak nia paternidade, katak, Maromak mak Aman, liuliu Jezús nian no liuhusi Nia, fiar-na'in sira-nian. Ne'e mak relasaun aas liu Maromak nian ho ema sira no ema sira-nian ho Maromak. Jezús kontráriu ho buat ne'ebé akontese, nia la rekruta ninia maktuir sira husi ema matenek no kbiit-nain ninia tempu nian, maibé entre sira ne'ebé kí'ik no haraik an, sira ne'ebé loos duni hein Reinu no prontu atu simu nia. Jezús lori sira stu komprende Maromak nia mistériu, nune'e deskobre segredu ksolok nian no ksolok loos nian.

Meditatio

Tema ba Solenidade Jezús nia futar Fuan santu maka “Jezús nia domin ba ema sira”. La'ós domin enjerál ida, hanesan ida ne'ebé profeta sira fó sai, maibé Maromak nia domin ne'ebé foti isin, halo an ba ema. Jezús nia futar fuan mak buat umanidade nian ne'ebé Liafuan asume. Nia maka “pontu” iha-ne'ebé umanidade tomak Jezús nian horik bá no hasoru malu ho divindade, nune'e realiza, mistériu boot Maromak halo an ba ema. Se umanidade tomak Jezús nian maka sakramentu primordiál salvasaun nian, ninia Fuan maka sakramentu espesiál liután.

Espiritualidade Jezús nia futar Fuan nian, orijinariamente mak espiritualidade monástika (moris iha sékulu XIII) liuliu iha mosteirun femininu sira. Via monástika ida-ne'e halo espiritualidade Kristu nia futar Fuan eskola místika, eskola ida santidade nian, buat ruma ezijente no kle'an. Ne'e mak espiritualidade ida kontemplasaun nian no la'ós devosaun. Ko'alia kona-ba Jezús iha krús leten ho nia sorin nakloke, no la'ós kona-ba Fuan sona borus... Presiza filafali ba místika ne'ebé ko'alia ba antropolojia no, hakat liu prátika devosaun no akumulasaun seluk sékulu ikuikus nian, hodi sadere ba fatuk inan místériu Liafuan halo an ba ema, filafali ba espiritualidade Jezús nia Fuan nian, fonte nafatin válida salvasaun no santidade nian.

Jezús nia Fuan mak ita-nia knuuk/bersu: "Ita hotu moris iha ne'ebá... sira balun no seluk moris iha-ne'ebá", hanesan Salmu Siaun nian ida haktuir (Sl 87, 4-6). Jezús nia Fuan mak ita-nia Siaun: "Ami-nia hun hotu iha Ita". Ita moris husi Nia, husi Kristu nia futar Fuan santu, nakloke iha krús moris mai Kreda no hodi Espíritu nia kbiit forma an sai komunidadade domin nian.

Tanba sá mak Kreda propoin Fuan nu'udar sinál konkretu domin divinu-umanu Jezús nian, nu'udar espresaun ne'ebé fó hanoin kona-ba domin ne'ebé Maromak iha mai ita? Tanba iha Bíblia, fuan maka parte nobre/datok no importante liu ema nian. Nia maka "núkleu íntimu ema nian", sede vida espirituál nian, fatin dí'ak liu enkontru nian ho Maromak. Husi fuan mak sai buat ne'ebé hafoer ema, maibé mós buat ne'ebé hasantu nia. Fuan reprezenta, buat ne'ebé ohin ita hanaran "ego kle'an", "ego segredu nian". Iha kultu ba Jezús nia futar Fuan, ita fó onra ba Maksoin nia pesoa no nia lori ita ba ninia sentimentu no ninia hahalok salvasaun sira nia hun. Interese ba Jezús nia fuan mai kedas husi Testamentu Foun, iha momentu Kristu mate. S. João, ho importánsia boot ne'ebé fó ba ema nia hateken ba Jezús iha krús, loke dalan ne'ebé lori ba kontemplasaun kona-ba ninia sorin nakloke no ba kultu Jezús nia futar Fuan nian. Ninia komentáriu ba epizódiu ida-ne'e: "Sira sei hateke ba ida-ne'ebé sira sona borus" hatudu duni nu'udar profesia ida.

Ba ita ohin, fuan la reprezenta ona buat ne'ebé reprezenta ba ema bíbliku. Maibé ita sei bele hetan iha linguajen komún no iha sentimentu ema sira nian espresaun sira ne'ebé hakbesik ba konseitu bíbliku: "ema ne'e iha fuan/laran dí'ak", "nia fuan aat", "nia ema ida fuan nian"... Ohin-loron funsaun datok liu ema nian maka kakutak, inteligénsia, vontade... " Maibé iha tan buat ida ne'ebé tulun atu komprende, liu husi analojia, Jezús nia Fuan nia signifíkadu: fuan maka motór ba isin tomak; nia maka marka moris no mate; nia presente iha organizmu tomak no halo nia fekit ho ninia movimentu rasik; ba nia maka raan venozu (raan ho CO2) suli bá, hetan moris foun, resikla no haruka filafali ba membru hotu isin nian. Iha nivel espirituál, buat ne'e hotu, Jezús nia Fuan mak halo ba ninia isin, katak, Kreda! Iha Jezús nia fuan mak akontese purifikasaun dahuluk husi ita-nia sala sira hotu, esperansa no domin umanu hetan moris foun. Perdaun hotu, grasa hotu, inspirasaun hotu, esperansa no ksolok hotu, impulsu unidade no fraternidade hotu ne'ebé ita koko iha ita-nia moris, hahú husi sentru, katak Jezús nia futar Fuan.

Ida-ne'e mak Aman Maromak nia hakaran: atu iha nia hela Maromak nia an tomak, grasa oioin tutuir malu (kf Col 2, 9; Jo 1, 16). Razaun buat ne'e hotu nian mak iha krús tutun Fuan ne'e kumpre obediénsia totál no kmanek; tanba ne'e Maromak foti nia no tau iha nia liman ema hotu nia salvasaun. Jezús nia futar Fuan maka mineira (*tambang* -malaiu) iha-ne'ebé bele hetan "rikusoin hotu matenek no siénsia nian" (kf. Col 2, 3).

Ita bele sente laran-kmaan bainhira hatene katak Fuan ne'e kontinua moris iha ninia prezensa eukarístika. Nune'e importante tebes kultu eukarístiku iha espiritualidade Jezús nia futar Fuan nian. Iha Eukaristi relaiza filafali mistériu paskál tomak iha *hic et nunc*.

Jezús nia Fuan moris "iha Espíritu" hanesan mós Kristu tomak. Nia moris mós iha sira ne'ebé fiar iha nia. Jezús nia Fuan maka "fuan foun" ne'ebé Maromak promete liu husi profeta (Ezequiel (11, 19), no mós haraik mai ita iha batizmu. "Fuan isin nian" maka tenke foti fatin neineik-neineik "fuan fatuk nian" ne'ebé ita iha husi kedas ita moris mai no hatoos liután ho ita-nia sala.

S. Paulo hameno: "Buat nebe ema haree iha Kristu, halo ema haree mós iha imi", iha lia-portugés: "*Tende em vós os mesmos sentimentos que estavam em Cristo Jesus*" (Fil 2, 5). Iha sentimentu hanesan kristu nian, signifika iha fuan hanesan, hadomi, hanoin, halo hanesan nia hadomi, hanoin, halo. Hadomi maluk sira hanesan Evanjellu hameno mai ita, mak hadomi ho Jezús nia fuan, katak husik Jezús kontinua hadomi liu husi ita. Moris ita-nia vokasaun sarani, maka moris tuir Jezús, hanesan knananuk ida P. Zezinho SCJ, membru kongregasaun Jezús nia futar Fuan nian haklaken: "*Amar como Jesus amou, pensar como Jesus, sonhar como Jesus sonhou, viver como Jesus viveu, sentir como Jesus sentia...*" Madre Mazzarello hameno beibeik ba nia oan sira lemo rai nune'e: "Mai ita tama beibeik iha Jesus nia Futar Fuan, ha'u mós sei tama iha-ne'ebá, nune'e ita bele hasoru malu beibeik no dehan ba malu buat barak!" (Surat 17). Jezús mak halakon distánsia no muru hotu ne'ebé haketak ita, Jezús mak halo ita sai fuan ida de'it iha domin. Mai ita, loos duni, sai sasin kona-ba Jezús nia Fuan nakonu ho domin no husik nia kontinua hadomi maluk hotu liuhusi ita.

Oratio

Na'i Jezús, ita-nia Fuan mak modelu ba ha'u-ni a fuan nia movimentu hotu, no fundu atu selu buat ne'ebé ha'u deve ba Maromak nia justisa, fatin seguru iha-ne'ebé bainhira hasoru rai-nakdoko no tempestade sira, ha'u bele dehan ho liurai David: ha'u hasoru ha'u-nia fuan atu harohan ba Maromak. Sín, ha'u hasoru Fuan ida-ne'e iha Eukaristia santa, bainhira ha'u hasoru ha'u nia Nai nia Fuan, ha'u-nia belun dí'ak, ha'u-nia maun, Ha'u-nia Maksoin nia fuan. Ámen